

27. januar 2016

UPA 2016/67

Inatsisartut suleriaasiat § 33 immikkoortoq 1 naapertorlugu matumuuna inatsisartunut aalajangiiffigisassatut siunnersuut imaattoq saqqummiuppara.

Nunatsinni erngup nukinga atorlugu pilersuinissamut kiisalu avammut niueruteqarnissamut periarfissat unammilligassallu erngup nukinganik nukissiuuteqarfiusuni piukkunnaatilinnilu Naalakkersuisut nalunaarusiornissamut peqquneqarnissaannik Inatsisartut aalajangiiffigisassaattut siunnersuut. Nalunaarusiami erngup nukinganik nukissiorfinnik pilersitsinissamut aningaasalersuinissaq kiisalu tamatumunnga periarfissat ilaatinneqassapput. Nalunaarusiaq kingsinnerpaamik inatsisartunut UKA2017-imi saqqummiunneqassaaq.

(Inatsisartunut ilaasortaq Anthon Frederiksen, Partii Naleraq).

Tunngavilersuut:

Imeq imermillu nukissiuuteqarneq suli annerujussuarmik atorluartariaqaripput Partii Naleqqamiit isumaqarpugut. Erngup nukinganik nukissiuuterujussuarmik pilersitsisoqarsinnaananeranut ukiut arlallit matumali siorna piareersarneqarlutillu misissuiffigineqarneri annertoorujussuit ingerlanneqareerput. Tassani maniitsup nuullu timaani suliffeqarfissuup aluminiumik aatsitsiveqalersinnaananeramik pilersaaruteqaleraluarneranik nunatsinniit piareersaasioqataasimanermut nukippassuit aningaasarpassuillu atorneqarsimasut asuliinnartinneqassanngippata erngup nukinganik nukissiuummik pilersitsinissaq pimoorullugu naammassiniarneqartariaqartoq isumaqarpugut.

Isumaqarpugut taamaaliornikkut nunatsinni suliffissaqartitsiniarnikkut minnerunngitsumillu piffissaq ungasinnerusoq isigalugu nunatta erngup nukinganik nunatsinniit avammut niueruteqalersinnaanera pitsaasumik periarfissinneqassasoq.

Tassami sulliniutit Alcoa-mut tunngasut maannakkut unissimapput ingerlaqqissinnaanerallu nalorninartulerujussuannngorsimalluni.

Isumaqarpugut nunatta avammut niuernermini erngup nukinganik tunisassiorneq pimoorullugu piviusunnortippagu, tamanna nunatta siunissami aningaasarsiornikkut, suliffissaqartitsinikkut allarpassuartigullu iluaqutigilluarsinnaagaa, tassami maannakkut avammut niuernitsinni niuerutissanik iluanaarutigisinnaasatsinnik amingaateqarpugut.

Suliamut tunngatillugu misissuinerparujussuit ingerlanneqareernikuupput taamaammat misissueqquerujussuarnissaq annerusumik pisariaqarsorinangilaq, taamaallaalli nukissiuuteqalernissamut aningaasalersuinissamut periarfissat aamma avammut niueruteqarnissamut periarfissat aqutissallu suliarinissat pisariaqassallutik.

Erngup nukinganik atorluaaneq avammullu niueruteqarneq eqqarsaatersuuteqarfigissagaanni aamma ilanngullugu eqqarsaatigineqartariaqarpoq nunatta kangiani erngup nukinganik atorluaanissamut periarfissat. Tassanngaanniit islandikkoorlugu europamut niueruteqarsinnaanerup periarfissai kitaaniit amerika avannarlermut niueruteqarsinnaanermut periarfissaasunut assigusutut isikkoqarmata. Nalunaarusiaq taamaammat nuna tamakkerlugu erngup nukinganik pilersuinermut piukkunnaatilinnik, periarfissanik aammalu erngup nukinganik nunatsinni atorluaanissamut unammilligassanik ersersitsisuussaaq, aamma avammut niueruteqarnissaq eqqarsaatigalugu.

Pisortanut aninggaasaqarnikkut allaffissornikkullu kingunissai:

Naatsorsuutigineqarpoq nalunaarusiap annerpaartaa paasissutissat pissarsiareriikkat tunngavigalugit suliarineqarsinnaasoq, taamaattorli aamma paasissutissat pissarsiareriikkat tunngavilersoqqissinnaanerat pisariaqartinneqarsinnaavoq. Naatsorsuutigineqarpoq tamanna AC fuldmægtigitut atorfillip ataatsip ukiumut akissarsiai 500.000 kr-iusut ataasiarnerisa imaluunniit marloriaataasa iluani naammassineqarsinnaassasoq.

Namminersortunut aningaasaqarnikkut allaffissornikkullu kingunissai:

Soqanngilaq.

Innuttaasunut aningaasaqarnikkut allaffissornikkullu kingunissai:

Soqanngilaq.